

Tuesday, June 17, 2025

Time - 2:30pm

C. NGUNLIANCHUNGA

Lawngtlai West bialtu MLA Pu C. Ngunlianchunga chu vawiin khan Special Judge (Prevention of Corruption) hmaa a inlan hnuah Bail a dilna pawmsak a ni.

Congress MLA Pu C. Ngunlianchunga hi vawiin khan Special Judge (Prevention of Corruption) Pu F. Rohlupaia hmaah a inlan a, Court chuan MLA hi Bail a dilna pawmsakin July ni 22 ah inlan leh turin a ti a ni.

Thudawn danin Lawngtlai West bialtu MLA Pu C. Ngunlianchunga hi man a nilo a, Court in man ngaihna a hmuhloh avangin bail hi phalsak niin bail a phalsak chhanah tlanbo hlauhawm anihloh avang leh hriselna lamah harsatna a neih avangin phalsak a ni a, thla leh July ni 22-a inlan leh tura tih a ni.

Pu C. Ngunlianchunga hi Anti Corruption Bureau in LADC CEM anih laia Lawngtlai by-pass road chungchanga NLCPR atanga sum an hmuh chungchangah pawisa tih chingpen avangin thubuai a neih thu an sawi a, Pu C. Ngunlianchunga chuan kumin March thlaa Assembly thutkhawmah Chief Minister Pu Lalduhoma'n a sawichhuah hnuah a hre chiah tih sawiin Lawngtlai bypass road siamna atan a CEM laiin kum 2013 ah cheng vbch 4 sing 7 a rawn chhuak tih sawiin kum 2014 January thlaah Minister anih tak avangin CEM atangin a bang a, a hre zui tawhlo tih sawiin sum thianghlimlo cheng khat mah a lak loh thu alo sawi tawh a ni.



HORTI FAIR 2025

Horticulture Fair 2025 chu vawiin khan Aijal Club Park-ah Horticulture Minister Pu C. Lalsawivunga'n a hawng.

Horticulture Minister Pu C. Lalsawivunga chuan Horticulture Fair chu thlai chingtute leh a zuar thinte tan "Buyers & Sellers Meet" lian tak a nih chhoh mek avangin tun aia nasa zawka tan la a, midangte tihhmuhtu ni turin a chah a. Horticulture Fair kaltlanga hmasawna hmuh theih atangIn hmasawn zel dan turah rilru seng a, enge an siamchhuah ve theih tih te ngaihtuah turin a chah a. Horti Fair chu nakum Fur ruahtui tla in harsatna a siam hma May thla tawp lamah buatsaih ni se Zokhaw lam atang pawhin tel an tam theih a beisei tih a sawi a. Kalkhawmte chu an thiltih hlawhtlinpui tuma theihtawp chhuah turin a fuih a ni.

Kumin hi Horticulture Fair a stall phochhuah tam ber tum a ni a, Pangpar dawr - 128, Thei tiak zawrhna - 60, Leitha leh thlai chinna hmanrua zawrhna - 11, Pot zawrhna- 6 awmin a vaiin dawr 205 pho chhuah a ni.

Horticulture Department chuan Mizoram a thei leh thlai chi hrang hrang chingtute, pangpar chingtute leh a zuar thinte, thei leh thlai atanga ei tur vawn that theih siam lama tui mite pualin kum 2012 atang khan kum tin fur ruahtui tlak tan hun, thei leh thai chi hrang hrang phun hun mil ber turin May thla tawpah emaw, June thla tirah Horticulture Fair chu Mizoram khawpui ber Aizawlah a lo buatsaih thin a. Kum 2020 leh 2021-ah erawh chuan Covid-19 hri leng vangin buatsaih a ni lo thung a. Kum 2012 atanga 2024 thlenga stall neituten an hralh chuah tawh zat chu Cheng nuai 346, sing 3, 607 a ni.



HORTI AWARD

Horticulture Fair pualin District tin atanga Best Horticulture Farmer thlanchhuah te hnenah lawmman hlan a ni a, kumin atana District ti tha berah Champhai leh Saitual District thlan an ni.

District tin atanga Best Horticulture Farmer hi kum tin thlan chhuah thin a ni a, Horticulture tangkai taka hman leh hmasawna nei thate thlan thin an ni a. Lawmman dawngtute hnenah hian chawimawina thuziak leh sum fai pek a nih bakah, Selco Foundation chuan Solar Sprayer a pe theuh a, state dangah an hmalakna hrang hrang a tlawh kual pui bawk dawn a ni.

Kumin atang hian District hrang hranga Horticulture Department a thawkten inelna thianghlim an neih theih nan Best Performing Horticulture District Award siam thar a ni a. He lawmman hi Champhai leh Saitual District chuan an dawng a ni.

Best Performing Horticulture District Award thlang tur hian Directorate-ah Technical Selection Committee mumal tak siam niin tehfung hrang hrang hmangin uluk taka thlan chhuah a ni a. Best Performing Horticulture District lawmman atan cheng sing thum leh citation hlan a ni a. Selco Foundation chuan leitha leh thlai rannung leh natna venna kahna turin a mamawhte hman theih turin hmanraw tha an tum sak bawk a ni.



LS MP

Lok Sabha MP Pu Richard Vanlalmangaiha chuan nimin khan Ministry of Tribal Affairs Secretary Pu Vibhu Nayar chu a Pisa ah kawmin Mizoram tana hmasawna awm thei tur thilte leh Zirlai Scholarship chungchang an sawi dun.

Pu Richard Vanlalmangaiha chuan Mizoram State chu a bik taka enkawl ngai an nih thu sawiin zirlai ten kum tina an dawn thin Tribal Scholarship rawn kal tlai thin chuan zirlaite ten harsatna tam tak a siam thin thu sawiin a hun taka zirlai ten Scholarship an hmuh theihna tura theihtawpa hmalakpui turin Tribal Affairs Secretary Pu Vibhu Nayar hi a ngen nghal bawk a ni.

MP Pu Richard a chuan Mizoram chu Tribal ram a nih avangin Tribal Affairs Ministry chu an ta neih bik hle thu a sawi bawk a. A bik taka Mizoram chu enkawl a, State hmasawna hna mai bakah a chhunga cheng mihring thlenga hmasawna kawng awm thei hrang hrang ngaihtuahpui turin Secretary hi a ngen bawk a ni.

Tribal Affairs Secretary Pu Vibhu Nayar pawh zirlai Scholarship chungchangah te leh hmasawna kawng awm thei kawng hrang hrangah theih tawp alo chhuahpui tur thu a hrihl a. Secretary hian Tribal Affairs Ministry hnuai a project leh Scheme hrang hrang awm thei te lo hrihl in Project te pawh a tam thei ang ber siam turin Pu Richard Vanlalmangaiha chu a lo hrihl bawk a ni.



PM MODI

Prime Minister Narendra Modi chu wawiin tlai hian Kananaskis, Canada a G-7 Summit neih turah a tel dawn a. Hei hi a zawna G-7 summit vawi 6 a telna a ni ang.

G-7 Summit neih turah hian khawvela ram hmasawn zual pasarih - France, US, UK, Germany, Japan, Italy, Canada leh European countries intel khawmte an tel dawn a ni.

Kumin G-7 summit ah hian khawvel pum huapa khawtlang hmasawna hrang hrang turte, venhimna kalpui a nih theih dan te leh chak zawka digital transition kalpui a nih theih dan te summit ah hian sawiho a ni ang.

